

劉兆祐博士主編
中國史學叢書三編

皇祖
四大法
(二)

臺灣學生書局 印行

劉兆祐博士主編
中國史學叢書三編

皇祖四大法 (二)

臺灣學生書局 印行

皇祖四大法卷五

江東臣何棟如謹輯

荆溪臣潘孔璧

同校

三阿臣陳克仕

治法

洪武六年春正月癸卯朔甲寅以舉人張唯王輝李端張
翀爲翰林編修蕭韶爲秘書監直長繼又以王璉張鳳任
敬馬亮陳敏俱爲編修是時天下舉人至京 上欲造就
其才擇其年少俊異者皆擢編修賜冠帶衣服令入禁中
文華堂肄業詔太子贊善大夫朱濂等爲之師 上聽政

之暇輒幸堂中取其文親評優劣命允祿日給酒饌每食皇太子親王迭爲之主冬夏賜衣時賜白金弓矢鞍馬寵遇甚厚○庚申禮部奏增廣國子生 上曰湏先擇國子學官師得其人則教養有效非其人增廣徒多何益蓋瞽者不能辨色聾者不能辨聲學者無師授亦如聾瞽之於聲色朕觀前代學者出爲世用雖由其質美寔亦得師以造就之後來師不知所以教子弟不知所以學一以記誦爲能故卒無實用今民間俊秀子弟可以充選者雖衆苟無端人正士爲之模範求其成材難矣故曰務學不如務求師今祭酒乏人卿等爲朕詢采天下名士通今博古才

德兼備宜爲人師者以名聞○辛酉江西行省商民坐沮壞鹽法刑官擬以亂法罪當死 上曰愚民無知犯法猶赤子無知入井見者莫不怵惕豈宜遽以死罪論之法司執奏不已 上曰有罪而殺國之常典然有可以殺可以無殺彼愚民沮壞鹽法原其情不過爲貪利耳初無他心乃悉免死輸作臨濠

二月癸酉朔遣貢外郎許允德使吐蕃令各族酋長舉故官至京授職至是喃加巴藏卜以所舉故元國公南哥思丹八亦監藏等來朝貢乞授職名省臺臣言來朝者宜與官職未來者宜勿與 上曰吾以誠心待人彼若不誠曲

在彼矣况此人萬里來朝若使其再請豈不負遠人歸嚮之心遂皆授職名賜衣帽鈔錠有差仍遣詔諭朶甘烏思藏等處曰我國家受天明命統馭萬方恩撫善良武威不服凡在幅員之內咸推一視之仁近者攝帝師喃加巴藏卜以所舉烏思藏朶甘思地面故元國公司徒各宣慰司招討司元帥府萬戶千戶等官自遠來朝陳請職名以安各族朕嘉其識達天命慕義來廷不勞師旅之征俱效職方之貢宜從所請以綏遠人以攝帝師喃加巴藏卜爲熾盛佛寶國師給賜玉印南哥思丹八亦監藏等爲朶甘烏思藏武衛諸司等官鎮撫軍民皆給誥印自今爲官者務

遵朝廷之法撫安一方爲僧者務敦化導之誠率民爲善以共樂太平初玉人造賜喃加巴藏卜印旣成以進上觀其玉未美亟命工易之其制獸紐塗金銀印池仍加賜喃加巴藏卜綵段表裏二十疋未幾喃加巴藏卜等辭歸命河州衛鎮撫韓加里麻等持勅同至西番招諭未附土酋○壬午詔禮部申禁教坊司及天下樂人毋得以古先聖帝明王忠臣義士爲優戲違者罪之先是胡元之俗往往以先聖賢衣冠爲伶人笑侮之飾以侑燕樂甚爲瀆慢故命禁之○戊子改群牧監爲太僕寺秩如舊以監令唐原亨爲太僕寺卿監丞孫模爲少卿始定養馬之法命應

天廬州鎮江鳳陽等府滁和等州之民養馬江北以便水草一戶養馬一匹江南民十一戶養馬一匹官給善馬爲種率三牝馬置一牡馬每一百匹爲一群群設群頭群副掌之牧馬歲課一駒牧飼不如法至缺駒損斃者責償之其牧地擇近水草豐曠之地春時牧放游牧秋冬而入寺官以時巡行群牧視馬肥瘠而勸懲之任滿吏部考其生息多寡以爲殿最焉○乙未 上諭中書省臣曰朕設科舉以求天下賢才務得經明行修文質相稱之士以資任用今有司所取多後生少年觀其文詞若可與有爲及試用之能以所學措諸行事者甚寡朕以實心求賢而天下

以虛文應朕非朕責實求賢之意也今各處科舉宜暫停
罷別令有司察舉賢才必以德行為本而文藝次之庶幾
天下學者知所嚮方而士習歸於務本○壬寅命御史臺
令監察御史及各道按察司察舉天下有司官有無過犯
奏報黜陟上諭臺臣曰古人言禮義以待君子刑戮加
於小人蓋君子有犯或出於過誤可以情恕小人之心奸
詭百端無所不至若有犯當按法去之不爾則遺民患君
子過誤責之以禮義則自知愧悚必思改爲彼小人者不
識廉耻終無忌憚所以不得不去之也故朕於廉能之官
雖或有過常加宥免若貪虐之徒雖小罪亦不赦也

三月癸卯朔乙巳定設給事中十二人秩正七品看詳諸司奏本及日錄旨意等事分爲吏戶禮兵刑工六科每科二人凡省府及諸司奏事給事中各隨所掌於殿庭左右執筆紀錄具批旨意可否於奏本之後仍於文簿內注寫本日給事中某欽記相同以防壅遏欺蔽之弊如有特旨皆纂錄付外施行鑄給事中印一推年長者一人掌之置欽錄簿三中書省一文職官錄之大都督府一武職官錄之御史臺一監察御史錄之凡奏本用厚白紙楷書紙後必書紙若干字若干起某字止某字背書該吏并書寫人某於皇太子親王前謂之啓本其式皆同但易奏爲啓若

係邊報及錢糧機密事重不待朝會合奏聞者於給事中處報知引奏省府臺各置銅櫃凡所錄旨意文簿收貯於內以憑稽考

夏四月壬申朔辛丑命吏部訪求賢才於天下 上曰世有賢才國之寶也古之聖王恒汲汲於求賢若高宗之於傳說文王之於呂尚二君者豈其智之不足也而遑遑於版築鼓刀之徒蓋賢才不備不足以爲治鴻鵠之能遠舉者爲其有羽翼也蛟龍之能騰躍者爲其有鱗鬣也人君之能致治者爲其有賢人而爲之輔也今山林之士豈無德行文藝之有稱者宜令有司採舉備禮遣送至京朕將

任用之以圖致治

秋肱已亥朔丁未更定有司申報庶務法國初凡有司庶務若戶口錢糧學校獄訟之類或每月具其增損見在之數書於冊縣達於州州達於府府達於行省類咨中書吏牘煩碎而公私多糜費又有司決獄笞五十者縣決之杖八十者州決之一百者府決之其徒罪以上具獄送行省由是州縣或受賊減重從輕省府或弄法加輕入重文移駁議囚繫淹連至是命中書省御史臺詳議務從簡便乃革月報爲季報以季報之數類爲歲報凡府州縣輕重獄囚卽依律斷決不須轉發果有違枉從御史按察司糾劾

令出天下便之○已酉以侍御史文原吉爲秦府右相國
子助教朱復爲燕府叅軍論曰王今長宜朝夕左右輔
成其德三二年後遣王之國爾等宜盡心所事取監於古
何者爲善何者爲不善采撫古人仕爲王臣孰能以正輔
導孰爲不能編次成集朝夕覽觀遇有所行則擇其善而
去其不善務引王於當道爾等與王言待臣下則以謙和
撫民人則以仁恕勸耕耨以省餽餉禦外侮以藩帝室如
此則能盡其職矣又曰爾等職事清簡非朝廷劇任之比
若文武全才更可演習武事發舒精神若素儒生但謹守
禮法陳善閉邪而已苟巧詐無實欺蔽諂諛此招咎之道

所宜戒也汝其慎之

冬十月戊戌朔壬寅

上諭皇太子諸王曰用人之道當

知奸良人之奸良固爲難識惟授之以職試之以事則情僞自見若知其良而不能用知其奸而不能去則誤國自此始矣歷代多因姑息以致奸人侮惑當未知之初一槩委用旣識其奸退亦何難書曰任賢勿貳去邪勿疑爾等其慎之○庚寅詔刑部尚書劉惟謙詳定大明律先是

上旣命頒行律令又恐小民不能周知命大理卿周禎等直解其義頒行民間旣而又令儒臣同刑官共講唐律曰錄二十餘條進覽 上爲斟酌擇其可行者從之至是重

命惟謙詳定大明律篇目皆准于唐其間損益務合輕重之宜每成一篇輒繕寫以進上命揭于西廡之壁親加裁定及成翰林學士宋濂爲表以進命頒行天下

十二月丁酉朔戊戌併僧道寺觀禁女子爲尼時上以釋老二教近代崇尚太過徒衆日盛安坐而食蠹財耗民莫甚於此乃令府州縣止存大寺觀一所併其徒而處之擇其有戒行者領其事若請給度牒必考試精通經典者方許又以民家多以女子爲尼姑女冠自今年四十以上者聽未及者不許著爲令

洪武七年春正月丁卯朔庚午吏部奏主事員多欲以主

事王性改任戶部 上不許曰自古設官分職以理庶務
政有煩簡故官有多寡當因時制宜豈得盡拘一律乎况
初入仕者政非素習必久而後通今未考滿而遽遷之使
所施者非所習事何由治職何由稱哉自今六部官毋得
輕調如有年勞者就本部陞用○壬午廣平府成安縣丞
唐詢蒞事甫三月以細故禁繫二年自獄中上書陳情

上曰非大故而禁獄二年若不幸而死詢何辜卽命釋之
逮問其官吏之淹禁者○陞太原府繁峙縣主簿虞文采
爲大同府知府時文采上言山西行省并按察司官吏事
多不法按有驗 上曰文采職居下僚能不避權勢舉言

其非可嘉也宜陞擢以旌異之故有是命

二月丁酉朔戊午衍聖公孔希學言先師廟堂廊廡圯壞祭器樂器法服不備乞令有司修治先世田產兵後多蕪廢而歲輸稅額如舊乞從實徵納上曰孔子有功萬世歷代帝王莫不尊禮今廟舍器物廢弛如此甚失尊崇之意乃命有司修治其田產荒蕪者悉蠲其稅仍設孔顏孟三氏子孫教授訓其族人

三月丁卯朔癸巳暹羅斛國使臣沙里拔來朝貢方物自言本國令其同奈思里儕刺悉識替入貢去年八月舟次烏諸洋遭風壞舟漂至海南達本處官司收獲漂餘蘇木